

# Txirritola

ARAMAIO / Barikua / 2003ko urriaren 31 / 83. zenbakia

KOORDINATZAILEA: Ubane Madera • Otolara Lizentziaduna 31, 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Makina bat gai landu eta onartu zituzten bilkuran

UBANE MADERA

**2004rako Foru Plana, ur-kontsumoaren gaineko zerga, herritar homosexualen gaineko mozioa eta Arangoiti ikastolari laguntza ematea onartu zituzten, besteak beste, bilkuran.**

Eguazteneko batzar horretan makina bat gai zeuden zerrendan lantzeko. Haien artean 2004rako Foru Plana ere bazegoen. Bi urtean behin egiten duten ekimena da hori. Herrian egin beharreko lan batzuen berri ematen dio udal bakoitzak Diputazioari, erakunde horrek lagun diezaion.

Aurtengo deialdirako honako zerrenda hau onartu zuen udalbatzarrak (garrantziaren arabera daude zerrendatuta): Arexolan kaleak zolatzeko aurreproiektua; Bentamotz kaleko ur-sarearen zati bat berritzeko aurreproiektua; Arriolan kaleko azpiegiturak berritzeko aurreproiektua; Errotabarri eta Salgo auzoetan kaleko azpiegiturak berritzeko aurreproiektua; Untzillako ur-sarearen zati bat berritzeko aurreproiektua eta Muru auzora joateko kalea zabaltzea; Zabolan goiko aldean dauden baserrietako ur-sarea berritzeko aurreproiektua eta argiteriaren

egoera aztertzea. Plan beraren barruan, oletarrek auzoko plaza urbanizatzeko proiektua aurkeztu dute.

Orain, eskaera guztiak esku artean izanda, Diputazioak banan-banan aztertuko ditu, eta diruz lagundu edo ez erabaki beharko du.

Bestelako gaien artean, larregiko ur-kontsumoa zigortzeko zerga ipintzea onartu zuen udalbatzarrak, baina hori zelan aurre-

ra eraman zehaztea falta zaie.

Bestalde, Aramaioko zenbait familia ugarik honako eskaera aurkeztu zioten Udalari: ondusun higiezinaren gaineko zergan hobariren bat izatea. Zinegotziek baiezkoa eman zioten eskaerari. Edozelan ere, inguruko udaletan gai bera zelan lantzen duten aztertuko dute, eta horren arabera erabakiko dute zelan aurrera eraman Aramaion.

### ARANGOITI IKASTOLARI LAGUNTZA

Orain dela pare bat asteko Nafarroa Oinez ere berbagai izan zuten zinegotziek. Onartu zuten Irunberriko Arangoiti ikastolari laguntzeko 625,25 euro ematea.

Eta, onartutako beste gaietako bat homosexualen gaineko mozioa izan zen.

Bukatzeko, esan beharra dago Hamalau taldeko zenbait kide osoko bilkuran izan zirela; eta jakinarazi digute aurrera begira pauso gehiago emateko asmoa dutela.

Era berean, esan beharra dago oraingo astean osoko bilkura berezia egin duela udalbatzarrak. Besteak beste zera aztertu zuen: udaletxeko lanak esleitzeko lehia-keta arautuko duen berariazko klausula ekonomiko administratiboen plegua onartzea.

*2004ko Foru  
Planaren barruan  
zortzi eskaera egin  
ditu Aramaioko  
Udalak*

*Arangoiti ikastolari  
dirulaguntza  
ematea onartu zuen  
udalbatzarrak osoko  
bilkuran*



TXIRRIOLA

Oraingo astean eta hurrengoan ekimen bereziak egingo dituzte eskolakoek.

## Umeak barnetegian eta bide hezkuntza ikasten

San Martin eskolako umeek eskolaz kanpoko ekimenak egingo dituzte oraingo astean eta hurrengoan. Hain zuzen ere, oraingo astean, eskolako bigarren eta hirugarren zikloetako 46 neska-mutiko eta lau irakasle Barriako barnetegian egon dira hiru egunez. Arabaz Blai programaren barruan antolatutako ekimena izan da, besteak beste, umeek Araba ezagut dezaten eta ingurumenarekin lotutako ekimenak egin

ditzaten. Iaz ere leku berean egon ziren.

Eta datorren astean bide heziketa landuko dute hirugarren ziklokoek. Hezitzaileak etorriko zaizkie, astelehenean bide hezkuntzaren arlo teorikoa lantzeraz (09:00etatik 15:00etara); eta martitzenean arlo praktikoa lantzeraz (10:00etatik 12:00etara). Iaz, bizikletak erabilia zirkuitu bati bueltak ematen ibili ziren ikasitakoa praktikatzen.

## Aramaiarrak bertsolari gazteendako lehiaketan

U.M.


**Abian da 2004ko Bertsotan Bagare lehiaketa. 20 bertsolarik parte hartuko dute aurten, tartean, Manex Agirre eta Andere Arriolabengoa aramaiarrek. Hiru kanporaketa jokatu dituzte.**

Aurreneko kanporaketa gaur, barikua, izango da, Araian, Zubigain jatetxean, 20:30ean. Manex Agirrek beste bost bertsolariren kontra jardun beharko du, eta kanporaketako lehenengo biak pasatuko dira finalera. Bigarren kanporaketa Amurrioren izango

da, baina, han ez da aramaiarrik izango. Eta hirugarrena Legutianon izango da, hango elkartearen, azaroaren 21ean, 20:30ean. Kasu horretan Andere Arriolabengoa beste zazpi lagunekin arituko da bertsotan. Eta kasu horretan ere, lehenengo biak pasatuko dira finalera.

Finala Gasteizen jokatu dute, azaroaren 27an, Beñat Etxepare antzokian, 20:00etan. Sei bertsolari ibiliko dira lehiari nork txapela jantzi.

Bestalde, azaroaren 6an, Ahozko Inprobisazioa Munduan izango da Laudion; besteak beste, Manex Agirrek parte hartuko du.



ARABAKO BERTSOZALE ELKARTEA

Datorren azaroaren 6an Laudion izango da Manex Agirre, bertso-saio berezian.

## LABUR

### Aramaioko EAJkoek Joseba Egibar gurago

Euzko Alderdi Jeltzaleko afiliatuak Euzkadi Buru Batzarreko ordezkaria nor izango den erabaki beharko dute. Dakizuenek, Xabier Arzalluz da oraingo ordezkaria, baina, hark kargua utzi behar du eta haren ordezkaria aukeratu beharko dute. Joseba Egibar eta Josu Jon Imaz dira kargurako hautagaiak. Bada, Aramaion EAJko afiliatuak dagoeneko egin dute aukeraketa, eta, hain zuzen ere, Joseba Egibar aukeratu dute Xabier Arzalluzen lekua hartzeko.



# Zapatuko azokak jende asko erakarri zuen herrira, bai eta Erretiratuaren Eguna ere

UM

Goizean goiz hasita sekulako giroa egon zen zapatuko Aramaion. Giroa eta jendetza. Eta ez eguraldiaren epeltasunarengatik, ez; jaiaren berotasunarengatik baizik.

Betiko moduan, baserritarren eta artisauen azokak erakarri zuen jende gehien. Baina baita Erretiratuaren Eguna ere. Argazkietan ikusten duzue, parrokiaren lagun dezente elkartu zen urtean hildako erretiratuaren aldeko mezan. Lagun Artea taldekoek fin-fin egin zuten haien omenezko dantza-saloia mezaren ostean. Gero, azoka ikusi, antzinako kontuak gogoratu eta kiroldegirantz egin zuten erretiratuak, bazkaltzera. 165 bat lagun elkartu ziren, iaz baino gehiago. Ondo bazkaldu eta gero erromerian ibili ziren. Eta Vital Kutzaren eta Euskadiko Kutzaren opariak eman zizkieten 12 laguni. Era berean, Ana Mari Jauregik (95 urte) eta Fidel Beitiak (91 urte) opari bereziak jaso zituzten, nagusienak izatearren.

Azokari dagokionez, handia izan zen; berritasunekin, gainera. Gogozintzarekin, tailarekin, ezgintzarekin... lotutako saltokiekin batera, errementaritzarekin lotutako erakusketa egon zen. Hortaz, gauzak erosteaz eta ikusteaz gain, ikasteko aukera ere egon zen.



Erretiratuaren Egunean ohi denez, jende asko ibili zen kalean zapatuan.



Herritarrek ipini zituzten saltokiak; tartean, Itur Zuri elkarteok.



Errementariak zelan lan egiten zuten erakutsi zuten Suoker taldekoek.



Erretiratu dezente elkartu zen mezan; gero, 165 lagunek bazkaldu zuten kiroldegian.



Lagun Artea dantza taldeak omenaldi beroa egin zien erretiratuari.

ARGAZKIAK: OLAIA MONDRAGON ETA ARANTZA IBABE.

## TELEFONOJAKINGARRIAK

### OSASUNA / LARRIALDIAK

|                           |              |
|---------------------------|--------------|
| Osasun etxea (txandak)    | 945 44 53 40 |
| Botika                    | 945 44 50 03 |
| Udaletea                  | 945 44 50 16 |
| Ertzaintza (Arrasate)     | 943 79 71 99 |
| Gurutze Gorria (Legutio)  | 945 45 52 52 |
| San Martin Eskola         | 945 44 50 04 |
| Taxia eta autobusak       | 945 44 50 33 |
| Udal kiroldegia           | 945 44 53 35 |
| Postetxea                 | 945 44 50 83 |
| Zuako Eskualdea           | 945 43 01 67 |
| Suhiltzaileak (Zubillaga) | 943 78 28 00 |

## AUTOBUSORDUTEGIA

| ARRASATE | ARAMAIO | GASTEIZ | GASTEIZ | ARAMAIO | ARRASATE |
|----------|---------|---------|---------|---------|----------|
| 07:00    | 07:15   | 08:00   |         | 07:50   | 08:05    |
| 10:00*   | 10:15   |         | 08:15   | 09:00   | 09:15    |
| 11:00    | 11:15   |         |         | 10:15*  | 10:30    |
| 12:00*   | 12:15*  | 13:00   |         | 11:15   | 11:30    |
| 15:15    | 15:30   | 16:15   | 13:10   | 13:55   | 14:10    |
| 17:20    | 17:35   |         | 16:20   | 17:05   | 17:20    |
| 18:30*   | 18:45   |         |         | 17:35   | 17:50    |
| 20:30    | 20:45   | 21:25   |         | 18:45*  | 19:00    |
| 21:00*   | 21:15   |         | 19:30   | 20:10   | 20:25    |

## OHARRAK

### ASTE BUKAERAN ZINEMA

Oporraldiaren ostean, berriro ekingo diote domeketan filmak emateari. Hain zuzen ere, eta nahiz eta oraingo aste bukaera berezia den, domekan, hilaren 2an, *Esperando la navidad* filma emango dute; neguko zinemaren ordutegiari dagokion moduan, kultura etxean, 17:00etan.

### HILERRIAK TXUKUN-TXUKUN

Bihar, zapatua, Domu Santu eguna izanda, hilerriek bestetan baino bisita dezente gehiago izango dituzte. Hori dela eta, guztia txukun-txukun egoteko Udaleko langileak lanean ibili dira, baita auzoetako hilerrietan ere. Hilerriguztiak zabalik egongo dira.